

藝文志中

碑記

序文

墓誌

藝文志下

詩

雜記

跋附載參末

永寧州續志

第六冊

永甯州志卷之十一

藝文志中

知永甯州事昆明沈毓蘭續纂

碑記

重修鐵鎖橋碑記

前貴州巡撫

曾璧光

皇清同治十有一年余撫黔六閱寒暑上下游苗獮各逆  
一律蕩平旣勞來遺民而還定安集之因釐剔庶政  
修舉廢墜盤江鐵鎖橋其一也橋在永甯州之西普  
安廳安南縣之東舊爲滇黔驛道兩巖壁立一水中  
奔舟渡則頽覆溺木石爲梁則易衝塌明季始冶鐵

爲繩貫於兩巖上覆以板懸梁而濟

國朝順治康熙間屢敝屢修鎮以石墩庇以棟宇規模加  
密雍正以來雖驛道改設不由此橋而各郡縣行旅  
仍所必經遂六歲一修著爲例迨咸豐軍興浸淫二  
十載蛇豕塞路荆榛蔽空是橋也斷絕朽株或毀於  
賊或蝕於風雨或沒於波濤無復有過而問之者矣  
爰命有司庀材鳩工頽者起之殘者補之壞者易之  
始於十二年正月訖於十三年六月約費二千有奇  
一舉而復舊觀焉余乃感於興廢之故而爲之記且

繫以銘曰

盤江險巖橋不可支乃以鐵爲鐵鎖鱗鱗有時沉淪  
窟我行人沉淪伊何寇亂孔多百務薦蹇寇亂何始  
官失其理民干厥紀官帥以正民感而應亂罔不定  
重修盤江鐵索橋碑記

貴州巡撫

崧

蕃

長白人

盤江之險甲於黔南兩山壁立一水中流奔騰澎湃  
渡者恆病焉自前明天啟時監軍副使朱公家民出  
其智巧創爲鐵索橋民甚便之至今幾三百年其間  
或毀於兵燹或蝕於風雨或漂沿於波濤傾圮者數



矣皆經前督撫趙公廷臣卞公三元蔡公毓榮楊公  
雍正劉公蔭樞暨曾文誠公賡續修理豐碑矗立  
然可稽顧自曾文誠修理而後至光緒十三年山水  
暴漲衝毀過半未卽修復乃設舟以渡歲有覆溺道  
此者皆有戒心余撫黔之明年庶政就理修舉廢墜  
適安義鎮蔣君宗漢以重修盤江鐵索橋謀於余余  
喜蔣君之樂於任事也遂舉此橋以畀之爰召工審  
度筮吉興修鐵之沉者造車以出之紐之斷者改鍊  
以續之索之缺亡者添製以補之低垂者催緊以平

之旁植扶欄中布木板兩岸石基亦皆修築完固經  
始於光緒十八年九月至次年十一月工竣余攷周  
禮司險知川澤之阻而達其道路孟子云十二月輿  
梁成誠以成輿梁以達其道路在官者所有事也余  
不獲與朱趙卞蔡楊劉曾諸公並世同

### 朝共襄

聖治而猶幸於蠻方窮窩山川阻深之地循其遺蹟修葺  
繕治相契於數百年之遙前哲風流恍如覲面尤願  
後之官斯土者有舉莫廢更閱數百年之久亦如今

日之加意護持焉庶斯橋可以長存而諸先正利物  
濟人之意益傳於不朽矣是役也董其成者安義鎮  
總兵蔣君宗漢程其功者署安南營都司孔昭雲盤  
江汎千總黃勝發軍功馬發榮金石土木各工與夫  
物料之值共費白金貳千貳百玖拾兩有奇橋租米  
四十八石零因備書之以俟後之君子有可考焉

重修盤江橋碑記

詠甯楊棫林釋節

盤江西界永甯東連普安安南重巖夾峙濁浪奔流此所謂天塹控扼滇黔者也明季朱叅政鑄鐵爲索三十六緮厥爲大觀聖朝代有偉人旋敝旋修橋賴以不朽同治十有二年黔撫曾文誠公於百廢俱舉之時竊一木難支之慮增其舊制告厥成功光緒丁亥仲夏蟄蛟肆虐鐵索沈江七緮僅存不絕如縷相傳烏江橋同日中斷毋亦天實爲之歟自時厥後舟楫攸濟覆溺數聞欲復舊規非仕有力者不能勝任非慷慨性成者競競焉爲不克是懼有心

人未嘗不感慨係之我鎮軍蔣公炳堂滇省鶴慶州人初  
平徇逆後征越南特旨擢安義總鎮壹是善舉惟力是視  
費鉅萬弗之惜也滇之鐵橋修自公者難更僕數樂善好  
施王言允錫其於斯橋之敝也久有志修復而又不自大  
其功遲之數年恐過此難爲繼也去年春函商之各大府  
得款千金永甯文武官紳籌捐三百金普安廳安南縣各  
籌款百七十八金用迥不敷公實解橐助之閱十月而工  
告竣是役也我公任其難各大府成其美後之人有同志  
者嗣而修之庶斯橋之不朽也

棧

不敏辱命撰記凡勒諸



貞珉者皆從其實至若流連景物前人之述備矣茲不復贅



重修明倫堂碑記

永甯州訓導

楊棫林

官教論者堂曰明倫官訓導者堂曰課士堂則異耳  
豈外倫以爲課哉永甯學僅一官課士之堂卽以明  
倫榜之統於一也同治乙丑歲署燬於火黔餉支絀  
議修復者輒格於當道歷年司訓僑寓民間亦可慨  
矣光緒庚寅夏余忝訓茲邑視事伊始亟欲導諸生  
使明其倫而身靡所棲士奚由課是年冬以修署費  
請於 大府旣得請則鳩工庀材期年而室成得費  
無幾堂未遑構遂告諸州牧 沈公集州人而謀之

六管州志 卷之十一 六  
僉曰堂之廢也久矣百廢具舉而茲堂未復可乎爰  
籌款百金有奇併工力構恢復舊規願登斯堂者顧  
名思義毋負君友毋戾父兄由庠序踐古人之踐爲  
邦家光不難矣詎僅博科名爲閭里榮哉於其成也  
泐石爲之記並題一聯曰學制復其初僅云記誦詞  
章道猶未也人倫明於上請將子臣弟友義更申之  
蓋欲使諸生觸目警心以品學互勵也董其成者孝  
廉張君仲達慕友鄒君德滋廩生鄭宣輝吳維藩王  
紹謨例得附書

灞陵橋德政碑序

并跋

楊茂材

竹樓刺史之諭磨其德政碑而系以詩也當世所僅見也一日者附嶺諸人士復繼勒於灞陵橋間踵門以告於材爲序謀也亦不欲其言之習見也客有見而詰之者曰刺史之諭衆所見也和其磨碑詩者且燦然成集爭以一見爲快也奈何弗之從而若故與之在也其人曰客之爲是言也自見其見可也異哉見其所見遂以其所見爲見並以其見律人之見也人之度量相越固甚遠也刺史之見非吾儕所及見



也吾儕之見客亦未之見也人各一心卽人同此心  
白水河之碑之所以終不磨也則刺史之自有其不  
磨者在也則吾儕莫不各有其不能磨者在也各有  
其不能磨而各卽其中之所不磨以爭紀乎刺史所  
不磨德政碑所爲見不一見也且也蒞永甫半載旋  
調黃平者吾刺史也自今以往其與吾民相見無多  
日也見此碑如見刺史也民皆如見刺史刺史亦如  
見吾民也是亦刺史之所樂與民同也碑之勒刺史  
之諭蓋自並行不悖也安在人之見之者之不再見

於詩也客之見無乃見其所見而不知所見之殊多  
未見也莊子所謂篤於時拘於墟者此類是也客聞  
之如夢初醒爽然失其所見也材曰是言也猶是自  
見其見也而自足見其所見也不必猶夫人之見不  
必不猶夫人之見也卽其言以爲序刺史德政可不  
言而自見也言之所不能罄者亦可於焉想見也楊  
茂材謹序

德政碑之盛莫盛於近日後先並列采風者固自別  
有定論也孔子曰觀於鄉而知王道之易易其爲鄉

民所爭立者是則吾竹樓刺史之德政碑生員姜鎮  
齊謹跋

壽文

朱觀察壽文

進士

楊茂材

澤難忘者莫知所報情不已者自生於文南山有臺  
一篇所爲本愛戴之忱形爲頌禱也恭維我綬堂夫  
子大人秉崧嶽之精英裕經綸於雷雨太夫子潛菴  
先生以名宦著於楚屨任時夫子侍焉束髮受書惟  
窮經致用爲務甫弱冠學成而歸出以應當世之知  
投無不合未三載以童子軍歷博士弟子員登賢書  
成進士古今文人遇合之奇者有矣發於硯而輒利

其試未有如是之一操券而獲也捧檄來黔兩充已  
卯壬辰同考得士爲盛旋以治行稱最擢司馬躋郡  
伯仰遇

聖天子特詔求賢首膺保薦

帝嘉納焉自是遍歷列郡屢獲監司以奉諱還籍六載  
重來蓋躬臨吾黔者三十一年而安郡經三至矣計  
自甘澍車隨無不所至民樂所去民思而化桐邑之  
險健戢黎境之猖狂尤爲卓卓可紀若夫廣廈則多  
士羣依大裘則羣黎共被其嘉茲土者固猶屬餘焉



耳論者謂夫子以年少捷南宮未獲與木天諸公上  
下其議蘊蓄蓋有未之罄者夫國家得百詞臣不如  
得一名臣假令當日者卽身親館職出入鳳沼鸞坡  
間亦不過掇藻揚華咏歌美盛安能本其所學見諸  
實事霖雨蒼生不一而足也且也才大者志多疎夫  
子則遺艱拔鉅有弗驚而節目罔或闕畧也明察者  
法易刻夫子則浸潤膚受所不行而讞鞫常存矜恤  
也民奉之以神君而又如慈父母焉天佑之以康強  
而又生賢子孫焉歲月日增福履日盛於以名垂竹

帛蔭庇無疆烏可意量計耶郡人士之爲壽也莫知

所報而情不自已也其以壽言屬之材也願紀夫子

之實謂知者莫材若也材固言之不文也第卽南山

而細繹之亦何爲君子壽者似爲我夫子言乎夫子

在一邑則澤及一邑在一國則澤及一國其所爲邦

家之基邦家之光乎上而公卿則名滿公卿下而婦

孺則名滿婦孺其所爲德音不已德音是茂乎庭堦

玉樹爭榮競爽其保艾爾後者正復何如也惟其有

之是以似之則以材今日之言謂詩人已先言之可

也卽以

材

一人之言合郡人士而公言之並合黔人

士而共言之當無以異也獨念

材

仰列門牆匪伊朝

夕筮仕粵東毫無建樹茫茫人海遽賦歸來靜念典  
型良滋愧矣倘異日或有所藉以傳得與皇甫湜張  
籍輩使人共知爲韓一弟子焉我夫子聞之當亦躋  
堂稱觥喜進一爵也夫謹序



沈刺史壽文

舉人 楊棫林

查城爲羅甸之僻壤居盤江之上游城少居民地無  
柅塞數經寇亂元氣久傷叠被天災戎機易伏非愛  
民如子不足撫黎元非疾惡如仇不足止奸慝卽使  
惠心可取威望足稱而權僅代庖官如傳舍亦難流  
膏於四境靖變於一時若菊卿沈公殆以存仁之心  
行止殺之政六馬賴以撫輯三司賴以奠安民壽矣  
國壽矣豈有推恩於衆而不集福於身者躋堂之祝  
亦分之宜棫自歷名場獲交時彥徧論黔吏咸推我



公歲己丑謬以司訓銓除是邦聞臥閣之有人未入境而先喜及至受事復荷訂交始焉公子從遊繼焉講席謬領每於承顏之際備詢出仕之由知登民於仁壽者非同行潦無源邀福於元穹者愈信岡陵可頌也公始家江左繼徙滇南居紗縠之行畧同蘇子守縹緗之舊不減王家考學山公早登賢書叠充都講辭牧民之吏就廣文之官蝶飛未上於空階鶴化先聞於客路公遠迎丹旄歸葬青山純孝可稱鄉人共述比及晚歲變起同懷痛鶴原而厯久不衰撫燕

雖而推情尤厚彝倫之敘福祉之徵也公幼偕雁行  
共承鯉訓已襄戎幕尙戀書燈共昆弟而搴芹渺魏  
科於拾芥而乃棘闈再薦桂苑難攀遂投筆以從軍  
誓請纓而繫虜馳驅三迤蕩平五州雖勳階未達

丹宸而仕版已登黔服初由木秩洊擢通階留一劍以答  
恩夢三刀而符兆試割鷄於溫水復携鶴於獨山素  
冠暫返鄉閭翠羽旋邀

帝命服官歷卅年之久奏績無一事之差六筦牙釐處脂  
絕潤屢膺臂使藉手成功開烏撒之銅山裕紫標於

錢府風送而青雲皆順日行而黃道無訛懼授查城  
資爲保障旌旗一蒞寒暑六更公接物以誠持躬維  
約獄防瓜蔓牘不曾留禮肅蘋蘩祭必如在樂善則  
惟力是視拾遺則有志竟成貴和遵諸葛之篇矢慎  
謹博陸之步似乎曹參守舊主靜無爲太叔秉鈞用  
威難望矣觀其誅暴如農之芟莠去惡如醫之除疴  
恥姑息以養奸用重典而止亂雷驚天地蟄蟲始蘇  
霜肅郊原敗籜盡掃今春普安寇擾接壤人驚嚴緝  
奸民悉置重法俾彈丸之地成磐石之安滕雖小而

國可爲莒因陋而戰有備此其志存思永功著輯甯  
州名允符天眷斯萃當耆年之初度已壽域之堪徵  
康強逢吉未有艾也夫人趙氏以淑慎之儀柔嘉之  
則鳳雛屢誕犀角皆靈甥館增輝於蜀山婿鄉近聯  
於洱海况此門楣之煥均成家慶之圖後重陽三日  
踰週甲七年械等或共官僚或居賓幕值介眉之有  
期忍結舌而無語謹抒短頌用祝修齡未罄盛德之  
形容聊表私忱於萬一耳

詞曰猗歟神君其品如菊少掇芹香芸編飽讀如藟

之色紅紫媚日壯赴戎軒甲兵滿腹如菊之香林皇  
散馥比仕黔疆邈邈悅服清絕饋金勤無留牘撫民  
以寬能養其欲除惡務盡恐滋他族去傲從謙去華  
從樸鴻案妻賢鯉庭子淑推愛荆庭化行雍穆德信  
有餘才非不足猛以濟寬民受厥福如彼黃花清姿  
拔俗露漚漚霜經肅肅生自晚秋植從空谷托地  
既高得天誠篤南陽仙種稀齡可續願厯千春俾爾  
戩穀

墓誌

吳視墓誌銘

孫如璧

公姓吳諱視字曰明號鑑齋 勅贈文林郎明經司  
真公之次子 誥封文林郎貴陽府教授綬來公之  
裔孫也年十六補博士弟子員雍正乙卯科遴選拔  
貢申乾隆庚午科副車癸酉舉於鄉甲戌中禮部式  
殿試二甲 賜進士出身榜下選授廣西昭平縣知  
縣尋簡發四川歷任什邡梓潼簡州南充璧山大甯  
綿竹安縣納谿射洪墊江雙流秀山等處年七十有



三告病其子名搢字廣揚增貢生遵川運例請發四  
川署榮經縣篆迎養署中數月公病未痊廣揚因援  
例告修墓扶病歸里侍養四載而公溘然逝矣公生  
於康熙戊子年九月二十六日子時卒於乾隆甲辰  
年六月二十四日卯時享年七十有七住於安南縣  
之成家庄葬於永甯州之崗所寨卜吉於乾隆丙午  
年九月二十七日丑時安厝外立艮山坤向內兼丙  
寅丙申其子廣揚舉其行述問墓誌銘於余且泣曰  
先君在日當書壁以示搢曰吾生平隱恨三端少年

多病未能廣讀聖賢詩書壯年不遇未能早竊升斗  
以養父母晚年登進未能有所建白此三憾也身後  
當銘之墓木以示不忘之故今日誌銘之請非特以  
垂後祀亦即以遵遺命也余曰嘻余聞公之憾余有  
以識公之志矣公之憾不可忘公之志愈不可及矣  
公生平德行文章仁風善政載在行述俱不復贅請  
卽以公之所欲銘者爲公銘之銘曰卓哉先生方其  
少也矢志崢嶸分陰是惜一卷時擎操觚立就藝苑  
蜚英猶以多疾腹笥未盈公雖有恨學孰與京當其

壯也志在孝行溫清無失甘旨迭呈甫遊太學請假  
南征承歡膝下色養肫誠猶以家食未嘗君羹公雖  
有恨孝莫與並及其晚也志切安氓恩施西粵澤被  
錦城屢遷繁劇竹馬懽迎生前懋績身後碑名猶以  
小割未展雲程公雖有恨業孰與衡嗟哉先生不憾  
人之所憾而憾人之所不知憾且憾人之所不能憾  
自旁觀而論少而壯壯而老固已無一之可憾而公  
猶自視歆然無之而不憾也無之而不憾斯無之而  
有遺憾也三憾何病三憾然後見先生

張明經墓表

舉人 畢節 楊綬章

夫環報貽庶後嗣之昌可卜鼎銘徵信前人之美斯  
彰門襲嘉祥必緣積善史傳孝義不在矜奇其有詛  
篤宗親行式閭里一鄉稱爲善士百代衍其清芬者  
見之樹堂張公矣公諱紹德黔之永甯人世有清望  
人推巨宗考大紱邑處士子三人公其仲也伯兄久  
列邑庠叔弟亦升國學公蜂腰無誚鵬翮更紱年二  
十補博士弟子員越年食餼秋試屢薦明經以終綜  
厥生平備有衆美其盡倫也墓依王母過令伯之陳

情嚴事厥兄類君實之至性其崇儉也淡泊明志宗  
賢則脫粟自甘渾樸在躬齊相則敝裘不改其濟人  
也駿惠旁周四隣待之舉火鴻規永定三族樂其分  
金其制行也動言游之賞至必因公締裴炎之交朋  
稱耐久有子曰沅前室吳孺人出也生近弱冠之年  
死悞友人之子舉家咸怒搆訟將成公曰吾豈終乏  
子者必以若子償吾子將以殺機掩生機卒寢其事  
踰年繼室杜孺人生子澧側室又生子深不數年澄  
與煥文相繼繞膝非熊再世能承顧老之權有鳳成

行更過薛家之數世之有仇莫解以訟終凶者聞和  
氣之致祥庶薄俗之歸厚公少肄業貴山一日喟然  
曰以負笈之遠致趨庭之遠邑有講院何至於此矢  
願輸金二百爲邑修書院倡比歸故里卒踐斯言由  
是廣廈宏開足庇寒士誦聲大起丕變窮鄉越數十  
年公子煥文遂舉孝廉主講席置宏文之館報食蘭  
陔登講學之堂蔭承椿樹人以爲佳話云鶴唳數經  
著作久佚燕貽有道門第將興子澄毓於庠煥文與  
於鄉孫枝繩承未有艾也公生於乾隆戊申年歿於



道光庚戌年葬於茶樹坡丙山壬向煥文於次子域  
林爲壬午齊年友比棫林司訓永邑又復割宅同居  
斷金結契索表先墓艱以陋辭爰舉大端揭諸墓道  
嗚呼家傳模楷歌周詩六月之篇世繼簪纓衍唐代  
尤齡之緒垂爲茂矩視此貞珉

永甯州志卷之十二

藝文志下

詩七右

紅巖古刻歌

有序

莫友芝

獨山州人

紅巖削立貴州安順府永甯州西北六十里諸葛營後山上深刻其端凡四十許字參錯不作行不正均大者逾徑尺小或五六寸字所占高可七八尺廣三之字赤而石青晚晴日射乃畢露望若圖五嶽形若鼎鐘糾結銘劃若禱寫物象其土人習稱孔明碑嘉慶中武威張介侯澍縣令撰續黔書乃指爲高宗代

鬼方紀功之刻道光之季陽湖呂堯仙佺孫開府與

守刺者謀巖下爲十尋架閣以施璫拓費不貲又地

高多霧雨常數日不得一紙故堯仙亟縮本以行尋

新化鄒叔績

漢勲

孝廉撰安順府志輒省併其字爲

二十五箸釋文助呂跋伸鬼方之說其詞甚辨自是

府州又依鄒釋省併仍字大小比密以就篇幅各刻

木應索者以故行本百無一真轉不若堯仙縮臨尚

存彷彿也文匪分隸其不自諸葛不待辨高宗撻伐

亦於地理乖錯不安因思禹貢雍梁並以黑水爲州

距又有導黑水至三危入南海之文驗蜀南入南海之水以滇黔之南北盤江會爲鬱江者爲最大斯巖適近二盤之會二盤源處左右挾滇池漢書地理志滇池縣下云有黑水祠鄭康成即引以注禹貢見史

記夏本紀集解

其注文云地理志益州滇池縣有黑水祠而不記此山所在地理志曰三危

山在鳥鼠之西南蓋鄭君子梁距及導川之黑水皆主漢志其意顯然其別引地記特以志未言山始增存他說不是即二盤爲禹所導黑水之確證禹導黑

爲定詁也

水至三危而是巖近其會然則是刻殆三危禹蹟與

貴陽本唐矩州宋元併于羅氏謂之羅氏鬼國明

衛置行都司開行省乃並云貴州矩鬼貴一聲譌轉  
非有三地且在安順東北不能越而西南鬼方無他  
師說惟干氏注易以爲北方國毛詩傳但云遠方余  
意殆即鬼侯九侯國耳武丁縱勤遠略而三年懸師  
萬山中亦事理之必不然者矣儀徵相國攷黑水以  
爲在雍在梁名同地異最是三危亦然故梁州所距  
當自滇池循南盤以達於北盤之會雲貴俱包其半  
乃於經文地形兩無指拄顧不能該兩盤源之夾漢  
祠定一說以申鄭義猶岐疑於蘭滄禮社之愈荒遠

亦其疏也咸豐庚申四月友芝將出都潘伯寅祖蔭  
大理趣爲歌詩書其藏拓卷端因傳經義正錯謬冀  
屬和以張之

禹經黑水既茫昧箋疏苦索金沙壩三危入海向何處  
一在北轍馳南轅紅巖攫出夜郎國龍畫螺書長結蟠

我循漢祠胗源受神蹟悅遇隨山刊洪水坤維患匪劇

四載所勤排滄便衍亨南瀆在指顧馮高息橋去千峰

寒剗辰鑿宿恣興會六丁雷電相後先刑成五嶽氣九

鼎光怪爛溢朱明天邊荒不識明德遠但記諸葛威群



蠻齊火銘勲久放失

齊火從武侯南征摩崖紀功碑書

家橋側今放求猶未獲

章子和永康庶常言訝此礫磔猶孱顏千秋萬歲一

承相舍彼不屬當誰專矩州鬼國貴行省循聲誤讀謔

仍沿儒生攷古別尋些寅車漫附弇山鐫湯孫中興撻

殷武有截不越荆楚間鬼方九侯一國耳何事鄙遠勞

三年乃知等爾匪事實武威誤筆承呂佺嚮來頗怪錐

指隘

胡渭禹貢

梁徽竟斷巴符關分明南交箸堯與正夏宅

已踰宛盤

續漢志宛温縣有盤江即今兩盤宛平讀

三危黑水異梁雍儀徵

要義精不煩惜哉弭節失檢剔禮社蘭滄岐耒刪衡碑

作偽敗楊慎嶽麓弃擲無人憐斯巖晚出見典則副黑  
脫手爭騰騫字青石赤又岫嶠氣壓周鼓商杆槃誓當  
箋詒詔永久奉此石祖彌經藩叔重古文換秦篆十不  
存一苦斟銓稍從樂馬究虞弇水書竹厯參摩研管子樂馬  
數篇云有虞箴樂馬已行矣蓋虞幣有樂馬之名今流  
傳樂正當金尚弇及虞一鉞等幣頗有文字相證處吾  
獨山土著有水家一種其師師相傳有醫厯二書云有  
三代舍弟祥芝會錄得其六十納音一篇甲子乙丑全  
作丙寅丁卯且云其初本皆從竹簡過錄其聲讀迴與  
今異而多合古音核其字畫疑斯籀前最簡古文也  
略明格西戊辰字象象龔舞承白環意爲部居就屬讀  
斷續瞽眩秋難安伯寅廷尉喜剏論趣實歌詠開其淵

壽陽馬平助劬督

祁相國及王少鶴農部

取證更拓張南山

廣東張南

山維屏鬱水攷亦以南北盤江爲禹貢梁州黑水

浪書臆見了逋負才薄奈此

苔花斑庶綠索和博大句特壯里典榮南還

紅巖碑

畢節舉人

楊械林

五嶽俯視羣山低岫嶺權輿名字奇狼荒蛾伏千萬億  
豈能一一圖王畿黔中維昔稱鬼國不識不知順帝則  
舍山巢石傍巖居劒峰壁立天雲黑粵若高宗曰殷商  
薈苗櫛髮柔要荒峒戶篋丁羅道旁洞胸釐面呼天王  
功成告厥職方氏竹帛尙蔑況書隸及金珠石示威撻

或曰象形曰指事一千四百歷春秋龍興虎視歸東國  
祖龍滅裂不解事坑儒赭石神鬼愁千古文章炳大業  
前開鴻都後虎觀周宣大籀九千言叔重說文十三篇  
一自北平獻朝廷往往山川得鼎銘馬頭卯金符詭譎  
鄉壁虛造羣丹青八體六書有真贗彥均滂熹疇能辨  
忠恕讀書不嗜精七十二家眊賞鑒吁嗟乎華岳剝蝕  
天台高碧落淋漓風雨肴貝邱虞卿季札墓並同壘極  
埋蓬蒿君不見我朝搜羅超百代寶鼎黃龍耀中外洛  
圖珊瑚天府珍斷碣殘碑人自愛又不見諸葛碑奇字

巖吾邑志乘稱佳哉或謂此碑肇漢相蓋闕質疑徵後

紅巖碑

龍運松

矚甲山前紅巖連神工鬼斧闢何年字小如升大如斗  
是誰紀功來雕鐫相傳武侯此駐兵碑名遂以諸葛傳  
後人郎辭細繹玩斷以高宗伐鬼方碑碣語意得真詮  
此字非篆非隸亦非籀想是三代神物亦或然壁立久  
經風雨蝕苔蘚篆碧火色鮮面有關索嶺之接天下有  
灞陵橋水流濺鳴潺潺掬摩險峻無人到廬山真面道  
旁引領徒望延從來岫嶺爲最古字青石赤老雲煙其

次岐陽宣石鼓薦諸太廟勤搜編此碑字奇語結屈應  
共禹碑周鼓歷萬千

題盤江宋孝婦碑

前貴州學使  
韋業祥

牂江流日夜聲牂江路千萬程江聲終鼓鳴不平妾心  
終古江同清妾爲夫妾長征妾爲姑妾強生呱呱者鴆  
矣存者瑩瑩呼吸生死百折而彌貞姑無子妾猶子姑  
尙存妾有俟姑無子妾代之妾無子生何爲天日之高  
不下及欲死欲生兩無術吁嗟驛壁數行書洒盡啼鵲  
終夜血滇雲南去天蒼黃貞魂藁葬今何方幽風卓節



湮弗彰採風使者爲徬徨山莪莪石齒齒石嵌山紀貞  
軌閨闈芳踪胥視此貞婦至今應不死

遊盤江鐵索橋

張煥文

兩山忽擘水中馳木石作梁不可支一從明季治鐵爲  
天塹盤江履如夷初來橋上心甚危驀地江風刮面吹  
勢如長虹空際垂又如匹鍊橫寒漪向聞鐵索今見之  
神工鬼斧復奚疑訪求遺蹟到荒祠朱公凜凜古鬚眉  
鱷浪鯨濤平險巖有功利涉合如斯行人不知幾何誰  
題壁猶存孝婦詩剗苔剔蘚讀殘碑斜陽掛樹日暮時

對岸猿啼悲復悲  
今來古往滄桑移  
永賴此橋鎮邊陲  
白水河

楊棫林

喜讀枚乘觀濤篇  
胸有邱壑無波瀾  
觀水有術豈其然  
觀於海者難爲言  
查城苜蓿遮闌干  
青松白水先生盤  
臣心如水門無闕  
青氈雖冷官非寒  
卹然一朝收大觀  
使我覽之開心顏  
發皇耳目中心煩  
灑練五臟清心肝  
淋淋浩浩翔白鸞  
岫雲屑雨增奔湍  
雷聲殷殷轟南山  
素車白馬驥屠巒  
巒覆邱潰嶺天欲  
掀魚鼈失勢潛鼉  
鼓江漢茫茫睜眼  
看誰爲蘇海誰潮  
韓長江大河泥沙  
翻

瀟湘洞庭皆一般讀書萬卷下筆難盈科而進無激滯  
對此因之發長歎全家宦海虛團團灑灑瀕如馬磐石安  
大阮中流寬且閑桂林山水傾瀛寰康侯視之真彈丸  
昆明池水海天寬雁影霍霍揮羽翰破浪乘風有阿連  
渾渾落落何高騫沙明水靜淵乎淵宮袍月夜來青蓮  
星宿蹄窪同根源容納萬象無輕軒中有靈犀何盤跚  
此邦知者休忘筌祿州響水潭潺潺飛泉百尺總巘岼  
廣陵何幸此何艱名人名勝有奇緣吾將以蠡測滂焉  
白水河觀瀑

龍運松

匡廬瀑布天下奇目所未見神爲馳今來驅馬出黃葛  
白水喧騰勢逶迤懸巖萬丈銀濤落震耳雷聲達通達  
六月晴天雨霧冪雪花迸噴爭飛隨到午日光交掩映  
川霞紅綠光迷離犀潭碧水深渟蓄奔放沿河勢渺瀰  
憶昔望水亭樓裡名流翰墨揮淋漓及今榛棘並瓦礫  
悵望踟躕幾縈思青山依舊水如故鬱極豈無大光時  
吁嗟乎青山依舊水如故鬱極豈無大光時  
烈女行爲鄭氏香蓮作

張濟

人生自古誰無死死得所兮重泰山宋家庄內鄭烈女

大節能全倉卒間恨不手提三尺劍恨不身出平百蠻  
弱息恐爲高堂累視死心如鐵石堅甯可玉碎無瓦全  
常留清白在人寰吁嗟乎人生自古誰無死死得所兮  
重泰山

題大佛洞

姚琳章

大佛舊居中和寺揀字不減瑯環地四時供獻山庄輸  
檀那本是長官施租多反爲禪林累俗務紛拏清規墜  
疎林久歇梵王鐘殘碑半蝕維摩字曉村刺史建維風  
膏火經營苦不充欲得廣廈庇寒士逕學當年狄梁公

訪得此寺久寂寞香祖歲飽奸豪橐裁撥永爲試卷資  
寶像權移培風閣我佛法力廣無邊小劫臨頭也茫然  
俯首屈寄人廡下韜晦於今二十年從來天道如轉轂  
寒臘未盡一陽伏貝葉潛回萬家春來造蒼生無量福  
鏡湖先生甫下車細詢民舍爲底虛父老面陳悲往事  
祝融不靜患難除先生俯聽心怛惻如何此災消不得  
青鳥家言炎帝宮不利東南利西北特捐鶴俸首倡修  
度地鳩工無倦色神來天馬歡聲動環裁松竹棲鸞鳳  
積軌惟安百堵居舉頭忽見七星洞洞門常覺紫雲護



傳聞古有神仙住惹得漁郎來問津桃源不隔紅塵  
路崖花磴蘚無人掃一帶夕陽暖綠草中開蓮座淨  
纖塵天然勝蹟皈三寶猶是河口如來身星斗幾移  
佛不老古石竒立獅象見伐毛洗髓大雄殿曇花法  
雨萬斯年蔓草寒煙今一變

飛雲題壁

鄭選士

東坡之東三二里蒼莽竒峯插天起飛雲幻石石幻  
雲瀑布遠噴千尺水鬱鬱葱葱氣佳哉黔南名勝誰  
與比查城四圍山中有喬嶽時聞道過來人朝陽洞

者是官間稱幽尋知是神仙吏苔蘚山徑古隱隱泉  
聲裏危石擁巉岩恰有飛雲意名山不在高大小何  
足易一字經品題頓覺山靈異既從飛雲來又向飛  
雲去對此飛雲洞曾否小者記



五古

紅巖碑

張煥文

衡峯岫嶠碑闕嶺紅巖碣片石峙南荒形古同奇絕  
莽莽榛棘中多年無人識好事者爲之髣髴意窺測  
殷宗紀厥功漢相銘其德所聞均異辭考据疑應闕  
壁立千仞岡何從揮翰墨石赤字渥丹非摹亦非刻  
其大也如斗小者不成列呵護有鬼神劫火難磨滅  
書法擅鐘王真蹟難再得此揭世所希篆籀體各別  
聚訟徒紛紛以惑而解惑自書契肇興即留此點畫

藤龍山紀遊

侯樹勳

夙慕藤龍山，魂夢結遙想。頻年混塵囂，無由寄心賞。  
暮春風日佳，約遂伸疇曩。文酒欣得朋，笠履快同往。  
攀援履危磴，未至神先爽。亭宇自迴旋，樓閣隨俯仰。  
入門寂萬籟，鈴語答風響。轉步入幽軒，心目忽開朗。  
憑視萬頃田，夕煙迷篠蕩。折旋又數武，簾蟠地尤敞。  
錫名自何年，龍勢真想像。少坐復登巔，飛閣層層上。  
一覽小眾山，煙嵐落吾掌。竒影愜素懷，斯遊信不枉。  
況逢同心侶，清談倚書幌。明月照宵分，羣慮息擾攘。

曉來萬念清周環視題榜翰墨皆名流  
郎景工摹訪思作十日遊籍使襟懷廣  
俗務徒相牽清福未能享主人苦邀遮  
歸懷彌悵惘再拜謝深情花木勤培養  
且留有餘趣他日更携馭

飛雲題壁

侯樹勳

名山有顯晦猶人有通塞當其沉抑時  
草木俱無色一朝經品題巖岫遂奇絕  
勝地以人傳千古同一轍永邑朝陽洞  
舊爲仙福宅頻年蝕苔蘚不在幽賞刻  
司拔下車始疏鑿驚獨得蕪穢與草萊  
芟除無遺孽



精光忽煥發陰晴都秀傑題曰小飛雲壁間留妙墨  
祇謂永朝夕尋幽常步屨何期欣賞人遠與山靈別  
翹首望行旌臨歧心惻惻聊題一片雲持贈相怡悅  
夜越懸巖

龍運光

夜影沉沉黑天容渾似墨使君塵民憂自起出擒賊  
吾邑踞山巔危峰勢勇崩白日猶畏行況乃當夜陟  
賢哉我父師偃息不自得要使眾惡驚何嫌山徑仄  
絕壁履維艱深谿望不測屏息下前峰蒼蒼照月色  
花下鞠囚

鄭選士

訟庭閒無事小園春先到伴花作主人四圍花旋繞  
延叟傍花坐亦是同其好呼囚跪落紅花應恥不肖  
公如花間月隔影重重照摘伏與發奸若有花魂報  
吁嗟乎河陽花城春意鬧爲政風流如相召仙吏花  
下作訟庭黃絹幼婦稱絕妙

七律

盤江橋

州牧

汪維翰

萬里盤江裂地來巨靈掌擘四山開波騰斷峽虛瀾  
楫石咽濤聲走怒雷湧霧迷漫千嶂合穿雲繚繞一

龍迴從今人渡金繩上共賴安危濟世才

盤江橋紀遊

鄒樹祺

南海三危一水通盤江天塹夙稱雄千緮鐵索憑空  
接百尺鐘樓對勢崇雲樹蒼茫殘照碧浪花奔逐夕  
陽紅大川利涉今無慮人力偏能補化工

鐵橋跨漢

張明良

連環索貫直行空履險如夷冶鐵功鰲背遙凌碧漢  
裏虹腰遠跨白雲中卧波不必鼉同駕達岸何煩鵲  
始通利物濟人垂萬古滇黔鎖鑰鎮剡東

遊小飛雲洞

張澄

洞訪飛雲值暮秋二三知己賦同遊  
拍幽鑿險前人闢斷碣殘碑  
刺史留敗葉暗通樵子徑  
夕陽斜掛野僧樓  
往來名士多題詠  
定有高吟據上流

重遊飛雲洞

楊棫林

刺史登臨憶昔年  
奇文奇地尚依然  
飛雲高聳成邱壑  
怪石旁通有洞天  
小住因貪幽趣足  
再來莫厭俗情牽  
歸途緩緩添詩興  
日落寒山起暮煙

重遊飛雲洞

鄒樹祺

白雲無際洞幽深前度遊踪今又尋  
壁篆苔紋成鳥跡風吹石竅作龍吟  
清泉瀉出千層玉黃葉飛殘滿地金  
如此名山須飽看不因謠詠動歸心

遊小飛雲洞

周銘先

飛雲題字記當時劫火猶存桂一枝  
徙倚危樓增眼界摩挲片石訂心知  
滿階黃葉仙人宅半壁蒼苔刺史碑  
得句髫年成往事吟朋分韻強徵詩

遊小飛雲洞

張宗彥

相傳古洞有仙蹤今日登臨着屐從  
樵徑久荒徵露

石僧樓虛掩不聞鐘茶煎新水供佳客葉落疎林見  
遠峯寄語山靈休拒我重來莫遣白雲封

登文昌閣

鄒樹祺

秋風初作十分涼晚眺憑欄引興長幾點遠山籠翠  
靄數間老屋透斜陽茶煙領畧尋幽刹風景依稀憶  
故鄉石磴同支僧共話歸來月色滿西廊

白水沉犀

張明良

滔滔白水散如綿疑是銀河落九天千尺珠簾看鯨  
躍萬重雪浪任犀眼波濤洶湧迷朝霰風雨飛騰亂



夕烟到此紅塵應盡滌乘槎直欲效張騫

馳岡擒盜

鄭選士

將入虎穴探虎子當頭忽見馱峯起蟻附猿升行路  
難石乳溜穿滴滴水柔柔條健兒腿夜來直逼山岡  
裏君不見從天降下周亞夫洞庭飛來岳鵬舉

五律

白水河

州牧

沈毓蘭

豈是天河瀉翻然銀浪沉黃雲橫碧漢白水證丹心  
越澗穿巖出飛花滾雪臨會當日正午五色錦紋侵

盤江橋

州牧 吳宗琳

滇水黔山界關津對峙雄江涵秋月白橋鎖浪花紅  
貫索垂千古連環繫半空宦遊家萬里策馬渡飛虹

關索嶺

吳宗琳

鳥道羊腸路巍巍勢接天將軍經百戰廟貌祀千年  
北斗虹垂露南征馬跑泉登臨來絕頂蒼翠落松烟

迎紫山晚眺

侯樹勳

夕照隔山明遙峯點點橫霞光高處合嵐氣晚來生  
偶與詩情會閒將畫景評半輪涼月上回首望檣城

烈女行爲鄭氏香蓮作

張濟

昔有留節洞今說宋家莊六十年軼事鄭女續前芳  
苦逾冰霜守烈爭日月光采風來輜使終古姓名香  
七絕

三獅拱象

張宗植

象鼻下垂形活脫鬣宮高建勢巍峩從來文教格凶  
頑獅子全力不敢搏

雙塔凌雲

張宗植

檣城已踞眾峯巔雙塔凌空勢接天最好晚晴高望

處筆揮五色落雲烟

留節洞

平遠州知州

黃紹先

古洞森森毓潔貞當年奇女死驕兵爲留清白人間  
永因借長峯著令名

留節洞

沈嘉績

洞名留節節留名人世滄桑幾變更如此貞操難再  
得瓦全爭不媿偷生

鐵鎖橋

州牧

沈毓蘭

一線橫牽兩岸通半天百尺掛飛虹江盤流水滔滔

去繼往開來紀盛功

鐵鎖橋

沈毓蘭

利濟行人來往通免他舟子渡爭功  
長江天塹今無限人力還資造化工

鐵鎖橋

黃紹先

浪簇長虹作勢奇飛橋鑄就路平夷  
天成鎖鑰盤江在喜見銷兵奏凱時

鐵鎖橋

張宗槐

砥柱中流鐵索通漫疑人事遜天工  
怒濤澎湃長江

澗一道飛虹掛碧空

鐵鎖橋

張宗彥

盤江天險古牂牁，難怪興歌無渡河。  
鬼斧神工橫鐵鎖，康莊孔道任人過。

鐵鎖橋望江

侯樹勳

飛橋十丈跨空行，下有風濤激石聲。  
滾滾濁波流不盡，出山爭似在山青。

白水河

黃紹先

瀑飛河畔有餘陰，倒捲銀潢耐客尋。  
愛看長編鋪萬



里滿腔冰雪鑿臣心

白水河

張宗彥

從來瀑布羨匡廬  
白水沉犀勝景如  
倒挽銀河落萬丈  
龍門高縱有潛魚

白水河

黃漢銘

白水懸流勢不平  
遙觀瀑布發詩情  
飛花滾雪誠難辨  
莫使匡廬負盛名

關索嶺

黃紹先

無數峰巒足底看  
摩空日月走雙丸  
南征自是開山

手萬古風雲護將壇

關索嶺

張宗彥

關嶺嵯峨勢接天  
漢家營壘至今傳  
南人不反神威在  
羸得英名父子賢

紅巖碑

鄭宣輝

紅巖果否是殷碑  
考據無從應闕疑  
風雨飄搖靈蹟在  
南荒片石競稱奇

雞公背

張宗槐

峻嶺嵯峨肖錦雞  
不辭風雨祇孤啼  
牛刀大用誰能

試獨借乾坤作堞棲

五絕

野人獻瑞

楊茂村

老農獲異產寶之不輕示愛我使君深殷殷爲效媚

月涉青灘

余啓豐

遠宦聯綿歷轉此生何太勞  
黜願隨孤月影沈如忠

信涉波濤高適

月涉青灘

楊茂材

微服挈奚僮黃昏渡頭涉祇有明月知清輝自相接

巡哨臥雪

龍運光

雪夜不知寒高臥柴扉裏哨卒相顧驚宰官尚如此

楊茂村

嚴冬作哨卒日與凍旗伍誰識風雪夜官亦同甘苦

余啓豐

夜越懸巖

玉貞

鳥道來雖險

李嘉

雙旌五馬過

李

只是夜猿多

高適

夜越懸巖

楊茂村

昏暮搗賊巢山谿越險阻回頭顧健兒壯哉真吾

四言

野人獻瑞

鄭選士

麥秀雙歧禾嘉九穗獻者殷勤知何以到飲茲太和  
蔚彼靈瑞農夫之慶拜仁人賜

野人獻瑞

鄧福照

地產靈奇農以爲寶叩諸識者云是瑞草胡爲乎生  
總因官好官下鄉來芹心藉表

履畝風餐

公來履畝忙  
煞童叟  
山肴雜陳  
公曰否否  
公之所餐  
舜葱堯韭  
勞我農民心





履畝風餐

鄭選士

履畝山間農爭供餽麥飯豆粥殊褻尊貴豈知廉吏  
菜根風味脂膏念切使我心慰

履畝風餐

鄧福照

公來履畝忙煞童叟山肴雜陳公曰否否公之所餐  
舜葱堯韭勞我農民心焉願受

久

夕

入

一

一

一

雜志

關嶺之白虎山有樹一株其葉化作蝶飛三日始盡  
沙營司屬有苗人化爲熊循至家妻惧正號呼遂悻  
悻然去視妻不在室輒歸弄其子鄉人共逐之乃不  
復來

同治元年城之西關坡有豹援樹而上羣以火器圍  
擊倏不見

關嶺龍頭山等處有母猪產小如象鼻約長五寸

紅巖諸葛碑下有草如薤而微大經冬不凋

募役司屬有葡萄井其水日吐圓沫如葡萄形

小飛雲洞舊供白衣大士像光緒元年有蚯蚓自座  
下出長尺餘大如擘指蜿蜒上下碧綠成彩

文廟大成殿後瓜蔓結如龍形葉葉相當勢甚夭矯

此光緒二年事州學至停科後是年始有獲雉者州  
人咸以爲瑞

西坡坪壘被賊人困其戈矛之屬有火自鋒尖吐出

光長尺餘許以濕物拭之少頃仍燄燄如初

農人謝再福力於躬耕而性孝咸豐十年髮逆陷城再福負其父起龍以逃賊舉及加諸父再福以身蔽之父獲免再福死於賊

朱櫻有孝行母羅氏八旬餘同治四年奉母避亂於八十石塋朱櫻不忍棄母而逃相抱泣爲賊殺之田宗林者幼失怙母唐氏日傭工以撫之及成立家爲賊破母揮之使去宗林執母手依依不捨見賊亦



無畏懼賊及之時同治四年十月初一日也

武童宋翰基與兄有基禦賊於冒寨敵潰兄不能奔  
翰三救其兄而歿

副榜謝廷瑄有文名生平一介不取有友人寄存銀  
五十金逃賊於外其友無人來取其家凍餒甚或勸  
以此銀暫救燃眉終不肯輕折其封如此介節方之  
古人洵無愧色矣

跋

州志之修閱六十年矣中間補輯於修  
孝廉者什之二三採輯於梁刺史者什  
之四子邇年屢議重修缺貫中心自楊  
先丞回年司訓於茲意慮我 菊卿父師  
成此不朽事業余不敏忝勸國事於癸巳  
七月開局事甫就緒楊君忽之北行以分修

屬鄒君臣後及余鄒君精申韓學州中幕  
府也稽察檔案不遺餘力余以事闕案牘  
往事於文多不暇求詳午衙放後刺史輒  
進局高推可否辭例悉也舊去逐條補入  
或詳或畧實事求是不足潤色為工也  
自天文以迄雜記凡十有二卷寥寥暑一閱  
其編定楊君壽病京邸移致函以是

考成否為詢誰諉喪梨未付而地下修文已  
迫不及待矣豈真才人為造物所忌耶何  
奪多友之速而不使之觀厥成也考成付  
梓嘉多友之喜於任事而追念於創稿  
未竟之謫公與修志之年月前後相  
殆亦冥之中有定數故爰綴數語於篇  
末以紀其事之始終云時在

光緒甲午孟冬月朔主講維鳳書院舉  
人張煥文考於州署之鰲厓西軒

